



Jumat, 22 November 2024
Ogen: Kejadin 30: 17-21



"Ibegiken Tuhan Pertotonna"



Kehadiren anak i tengah jabu cukup penting, kususna bas konteks geluhta i Asia enda. Anak e tanda kesangapen, anak e pengerakut, anak e si njunjung merga bapana. Emaka adi lit kalak erjabu toto kalimbubu e pe minter nge ngerana ia kerna ndatken si nangkih mayang ras sinutu cimpa. Bas jaman genduari e cukup mbue senina Morianta si la minter mupus enggo pe piga-piga tahun dekahna erjabu. Bali bagi situasi Rahel si tertekan, mungkin piga-piga senina Moria pe bage ka penggejapenna.

Erbage-bage perasan campur aduk, terlebih sanga idah Rahel maka pupus Lea nggo seh 6 kalak, arah perjabunna ras Jakup. Tapi ia langa lit sada pe anak ipupusna. Ngenan gia ate Jakup man Rahel, tapi ukur e sangkut nge lalap, janah arus talu lalap perbahan kacibalenna. Amin bage gia, Tuhan la kepe tunduh, wari sambar ku bulan, sambar ka ku tahunna, maka sada paksa natang tuah me si Rahel, erdandanken ibegiken Tuhan pertonna. I bas ia ertima e labo kepeken sia-sia, mbelin me Jusuf bas bertinna nari. Jusuf iberena gelar anakna e sabap enggo ipemasap Tuhan aib-na selaku diberu si la mupus. Meriah kal ukur Rahel.

Tuhan la tutup mata, kalak si erusaha desken Lea pe dengkehkenNa pertonna, ialoi Tuhan. Tapi kalak si ernalem man Tuhan i tengah-tengah keadan si mesera pe, bagi si Rahel e pe dengkehken Tuhan pertona. Tuhan ndengkehken tep-tep pertoton, la ibeda-bedakenNa, amin rusur si akap kita ilupakenNa dengen bene pengerapenta. Kita arus tetap ertoto alu ketedehen ate ras kiniteken sabap cara Tuhan ngaloi pertotonta la tersipati perukurenta. Kimawen la bagi sura-suranta dengen la minter bagi siniarapken kita tapi situhuna Ia tetap erdahin guna kiniulin kalak si erkeleng ate man baNa.